

箕

谷

詩

鈔

箕谷詩文集吾友查伯葵刺史之所作也伯葵前寓  
武林曾有菽原堂初集之刻通籍後以乞近再仕于  
皖養事畢始至三輔補肥鄉令調繁饒陽旋擢灤州  
牧先後三十年中著作益富公暇并刪汰其前所刊  
者手纂爲箕谷詩文集三十二卷書來諭余曰人生  
祇數十寒暑嘔盡心肝存此區區數寸之作苟不及  
身刊以問世他日豈易得友如丁敬禮者定吾文耶  
顧君抵灤郡後地廣事冗復際歉歲昕夕從公不遑  
暇食竟以勞瘁卒於官歿之日手稿而外僅存殘書

數麓清苦之況無異寒儒也詰嗣不遠七百里緘其  
詩文集見畀屬爲勘定以待集貲付梓冀州刺史心  
石沈君涿州刺史壽莊趙君夙與君爲道義交聞之  
均願分任剗劂之費吾師觀察陶鳧薌先生書來亦  
以刊貲寄助俾得不潰於成篋谷於書無不淹貫所  
載詩文隸事博雅未易參考茲集又係倩人所錄副  
本其中塗乙未補及焉烏亥丕之字舛誤孔多時錫  
山章君芝楣博聞好義以名孝廉館魏笛生觀察署  
中假讀兼旬多所訂正余方任校讐之役拜德良深

已初集有郭頻迦屠琴鳴二序於作者匠心所在言之無遺茲仍列諸簡端仍初志也道光乙未仲冬旣望石門愚弟方廷湖拜手書後

菽原堂集序

僕初學爲詩從青湖朱先生游耳海昌查君伯葵名甚熟先生言伯葵之詩深造有得不肯寄人籬下如其爲人聞其數往來湖上不妄與人交又嘗渡錢唐而東之甬上之枯蒼旅食四方無知之者歸且病乃主於梁山舟侍講家始得於酒坐識之落落然無所異於人也已而余讀書吳山之麓邀伯葵與偕盡發所著示予受而讀之而後知朱先生之言爲不謬而悔予交伯葵之不早也伯葵之詩於古人堂奧無所

不窺而騰踔變幻不能以一家名之爐韞停冒風雲  
入治杼柚在手花水成文淵乎浩乎莫得而測其涯  
涘矣顧其論詩大旨主乎消納嘗謂嚴滄浪香象渡  
河羚羊挂角只是形容消納二字之妙世人不知以  
爲野狐禪金元以降冗弱之病正坐不能消納耳又  
謂唐書元載傳胡椒八百斛他物稱是舉小包大立  
竿表景神而明之存乎其人余間持其說求之古人  
北宋以上溯乎漢魏如印印泥不失累黍非伯葵之  
窮微索渺何能及此嘉定錢竹汀宮詹評其詩爲詞

壇飛將又云代與查田斷推此手前輩賞音豈徒虛  
譽伯葵爲人在通介之間雖極窮困恥事干謁且抱  
負卓犖深機沉識人不能窺尙憶月夜攜酒清平山  
頂聽海門潮聲滾滾上富春去伯葵引滿者再顧予  
誦其舊作不能爲宰相會作良醫耳今日之良醫毋  
乃縣令是其聲淵淵振金石旣而悔之輒以醉解然  
則僅以詩人目伯葵者又淺之乎測伯葵矣今其初  
集刊成吳江郭祥伯序之甚詳予卽曩之所聞於伯  
葵與夫會合之久而得其所以爲人者述之於篇錢

唐屠倬拜謨



菽原堂集序

文章之事有二難焉約敕自好不越經轍而以邊幅  
見病卓犖偏人意主氣勢乃有奇佻詭常表裏已或  
絕殊彼我各爲一是求其通材世罕逢邁漢魏尙矣  
六朝以還代有曠逸今之作者流別唐宋子長逸才  
亦曰法後柳州傑士不盡榮古要以躡流遠祖體勢  
近宗苟有特達必非形合建安自具神鋒豈曰規模  
正始人心不同天巧時變卽其偏宕多奇已復領袖  
一輩查君伯葵異稟絕人媚學不倦動厄於世獨放

於天窮居幽屏提鵬挈鷺孤往遠邁模山範水放言  
而穿心出脇獨念則出鬼入神體製無詭於來今意  
指彌軫乎在昔目中所見文外獨絕夫遇合有命奇  
偶不齊彰纓承明不必東馬之彥冠冕當世豈盡燕  
許之筆焦萃婉篤中多姬姜莫得而纍唏矣又嘗見  
橫厲世宙馳聲海外百川仰流萬羽承翼洎夫赫赫  
攸寂聲華徂謝褰裳先遠襏裾卽去榮落轉燭頌謗  
隨之甚者覆手相軋集矢不顧證爲至愚面無小慚  
孝章要有天下大名元龍自非餘子可及尋迹按響

當不其然伯葵旣無藉於獎飾亦不訾夫遷流自信  
其學當日而衆不爲奪獨斷於中過時而人皆自失  
霜降木落水流花開傳之其人豈不在我僕幼而無  
似思之至深阨窮之遇相同研幾之道未極然於追  
往溯來探近索遠志趣不逮意過其通竊謂騷雅之  
變化遠近之離合英咀華實當有卓然自見者近出  
所著丐言爲證不暇辭讓爰引其端旣謝一言之知  
亦任百爾之誚二百年乃有此作一食頃欲使爲文  
覩縷未畢主臣而已吳江郭麐拜譔

質谷詩鈔卷一

海昌查 棖梅史著

古意

采蓮復采蓮涉江濡衣裳敢惜濡衣裳過時物不芳蓮開紅  
顏好蓮落紅顏老

參商謠

兔絲附樛木蔓延離故根陽雁忽背飛南北分其羣荆樹忽  
焉萎豆萁忍重論河海既異流各自忘其源結交重意氣黃  
金費不惜堂上賓客醉堂下兄弟泣妻子樂只且耶娘聲嗚  
咽

雜詩四首

茂陵揮素琴風吹鬢影綠蒼髯  
穎士奴感恩到鞭撲憐才唯  
女子其次則婢僕文人善相輕  
蛾眉乃謠詠機心唧捕蟬幻  
態蕉覆鹿讀書爲勢利若輩真  
碌碌容君數百人我有坡翁  
腹

富人妻曲逆卓識亦千載終恐貌取人奢愿良有在當其遣  
女時直以翟茆待假若骨不侯此事必深悔近來杵臼交其  
病亦如是豈於風塵中真能識國士惴惴冀幸心謂當衣朱  
紫欲以勢相結猜嫌從此始何怪車笠下每作路人視不忘  
貧賤交惟有公孫耳猶然嫌惡客又可論餘子

夫以命與人有如相餽貽豈不擇旨蓄物固有不齊況乎受  
之者調劑或失宜所以同體生乃有判雲泥達人貴自立不

爲塵網羈縻漢執戟郎遭遇亦已奇仕宦而神仙兼畜子與  
妻然且金門書自言臣朔飢何爲彼衆生擾攘無已時

湛湛中冷水欲汲還遠巡修綆三百尺轉索如轉輪深入濁  
流內取彼清且醇乃知絕俗者亦非賢達人所要范叔寒能  
安原憲貧九牛雖可餌何以勝釣緡片席雖可杭不如坐船  
脣

### 少年

歲歲防秋萬里遙殺人如草戰功高歸來少婦無顏色爲買  
胭脂鬻寶刀

### 讀尤西堂弔琵琶劇本感蔡文姬事

淪落拚教葬黑山阿瞞高義得生還底須笳拍鳴哀怨不見

琵琶入漢關

詠明季史事

六朝舊恨付江湖牛首山河入畔牢  
南海將軍悲薤苳涼州太守貢葡萄  
豐碑黨禍文章盡嗣厥君恩甲第高  
纔進霓裳新樂府維揚明月照弓刀

送家茂才

世官

之四明兼示陸少白

素生

片帆江上幾時歸慰我還來伴釣磯  
無限新栽楊柳樹飛花吹上故人衣

古意二首

汲水弗汲薪伐枯莫傷烏柏樹上有頭白烏  
井深水清井淺水濁縵短嬰小沃釜不足

流螢辭

小立梧桐下流螢上鬢絲欲將團扇撲捐棄已多時

和家南廬湖上訪謝校書

誰向江南唱鷓鴣橫塘猶記昔曾過白櫻桃下零星語紅豆  
蔻梢宛轉歌對酒暗愁春夢重泥人遲起曉風多離顏怕被  
深深見纔別銀燈喚奈何

紫雲村

青嶂夾迴谿艣枝軋空碧言尋紫雲村偶曳白雲屐麥秀映  
東臯人家聚西磧一犬吠桑陰羣雞上籬柵忽驚衣冠人拱  
揖兩不得亦知難爾汝相對呼曰客

渴驥吟



渴驥鳴河水竭壯夫馳車輪蹶釵光燿燿聲不平盍歸來乎  
海天闊上山荆榛下山樛葛水不可以車行陸不可以舟達

佳人

脂粉競華妝佳人無顏色妾欲持鏡奩破碎君子側太息號  
夫人素面曾傾國

層城

十二層城望欲無輪囷紫繡拆天吳雲和不雜鈞天樂蓬島  
難歸益地圖玉洞嬋娟原有婿清溪居處但稱姑月明白川  
長生草待得人間海水枯

有女

女蘿茅屋夕陽邊椎髻長裙正少年未必佳人遂傾國何曾

素面可朝天倚將修竹看孤影欲採芙蓉奈暮烟點檢嫁衣  
慈母綫也無新樣得人憐

### 高陽山

九月丹楓落餘霞渲林表徑仄石磴礪峰迴螺旋繞徠升學  
僂僂驚伏窺竊窵直上遠峯迴孤帆出煙杪寒沙漠漠開縞  
素無昏曉自知氣象殊能令衆山小

### 永安湖二首

我行金牛嶺健翮舉霜鵲同行客兩三跼跼負駝鑿背僂僂  
爬沙雨過苔滑笏峰迴見白龍蜿蜒南湖缺湖光忽破碎匹  
練向空裂棲神託鷗鷺解襟憩蓬華膠擾亦何爲笑爾頭如  
核

往尋雲生處比至雲已沒回顧來時路蓬蓬雲蕩汨危哉九折坂東西路飄忽白日遞左右倒行入雲窟陰森慘行旅步步遭顛蹶蛇盤出坤輿魚貫升天闕浩氣流不盡一身界吳越始皇此望海萬里懷溟渤豈知輶輶車乃付儵與忽

自題桃花影傳奇

顧誤周郎正少年烏絲闌乞美人憐閒吟香社頻中酒纔按珠聲便撥絃一曲春風劉刺史今宵殘月柳屯田梅花識與鳴鴻度家伎無從問矮箋

詠史

烏盡弓藏猛士哀大風歌尙有高臺留侯祇合辭龍準曾爲淮陰躡足來

寄五叔父蜀中

一片風塵色親封萬里書  
拆看應涕淚相見復何如  
聞道無長策駕言歸敝廬  
十年游子淚頭白問居諸

卽興二首

圓萍池館萬珠跳料理茶鎗與酒瓢  
小婢卻憐春雨好呼燈連夜種芭蕉

江南三月有閒愁短簿祠前碧玉流  
我愛葡萄春酒美江南不夢夢涼州

詠荆軻

三尺銅花匕首斑白衣冠自淚潛潛  
頭顱莫爲於期惜易水先知去不還

永安湖

湖山幽絕處莽蒼入雲烟一鏡割昏曉千雷入幹旋瀑流楓  
落處秋在雁來先采藥隨僧去相逢不問年

審山看桃花遇友人自都下歸話舊

三年聞爾滯燕臺今日相逢劇可哀范叔一寒何至此劉郎  
前度卻重來饑雖驅我猶耽飲病不離人亦愛才多少交情  
似流水桃花潭上踏歌回

友人山居

幾株楊柳帶棲雅半畝荒莊傍水涯詞鶴餘糧惟釀酒立錐  
無地尙栽花山廚飯熟僧先在釣艇人回月未斜愧我秋風  
衣短後南山射虎未還家

晚步

清淺泉如秋際月  
淡濃雲似畫中山  
野橋西畔隨谿轉  
萬樹梅花屋一間

孤山

日日斜陽裏  
青絲挈玉壺  
禽閒歸樹晚  
山近看雲無  
客况慙奴僕  
吟身入畫圖  
煙霞真供養  
未覺此山孤

種瓜大路傍

種瓜大路傍  
抱蔓故不分  
瓜生不敢摘  
恐遂爲路人  
誰家蕩子婦  
嗚咽請具陳  
蕩子昔年少  
糞土爲金銀  
青絲絡駿馬  
出入擁其羣  
里中游冶子  
交結意氣真  
銅街有酒庫  
歲與千萬緡  
東屯有良田  
署券無一存  
徒手面鰲黑  
欲歸猶逡巡  
語多

肺氣咽抱中兒亦呻嬌女十二三走來牽娘頻此女初生日  
阿耶未賤貧女長纔過膝涕泗與耶分四月初七日會言當  
從軍徑跨瘦驢去萬里衝蠻氛磨劒黃牛峽洗足白馬津漏  
卮弗注水破釜弗析薪六月服蒙茸不如絺葛新渴來厭粟  
肉不如酌漣淪一入貴人幕抗禮相主賓吹竽客在齊彈箏  
人自秦么盧雜男女角觥忘晨昏抱中兒生時不知有耶親  
臨卽當醢女一笑迴車輪千金買簪珥羣婢吹歌脣請爲展  
屢歌行路多酸辛留妾眼中淚潸君衣上塵去時瘦驢子蹠  
踏良已勤君今乘青驄此驢何足云生當同歸來死當埋其  
身

寄吳兔牀丈

騫

只應眼向古人青  
潦倒茅堂戶晝扃  
所惜七賢無酒譜  
轉憐千佛有名經  
杜陵瘦馬詩長詠  
崔護桃花夢未醒  
欲借牀頭三尺水  
秋風同上煮茶亭

寄友

聞說華陰道  
秋風匹馬過  
那堪南去雁  
隨爾渡黃河

紀事二首

百道秋毫度七盤  
裝綿繡甲尙生寒  
風雷六月徵書急  
冰雪炎天轉餉難  
節鉞韋臯方夙夜  
歌鐘魏絳想平安  
王師自有攻心法  
諸葛祠前駐馬看

玉環山勢鬱波濤  
百折迴渦弱羽毛  
日陷中峰關樹黑  
天穿一握海門高  
太平自合逋逃少  
積漸終憂薄伐勞  
安得巡邊



湯信國屯田重與刈蓬蒿

再寄五叔父時聞已離成都三首

鳥背千山落崩奔日夜呼離家萬里遠出險一身孤此日風  
塵老中年感慨殊勞勞衣與食心計轉嫌寵

吾祖彌留日呼予話客居猶垂兩行淚頻檢遠來書棧樹寒  
親鳥江雲晚就魚間關身萬里尙憶舊田廬

近日驅車去繫誰又見招巴童飲白雪蠻女度深宵縱有親  
朋在終憂道路遙西南方戰伐應謁霍嫖姚

擬唐人邊塞詞二首

赤幟紛紛戍白登蔗漿新賜氣憑陵長城飲馬無杯水出塞  
黃河六月冰

飲割黃狼徑路刀君恩十月賜綿袍牧羊城外千峰雪照見  
天南北斗高

懷吳榕園上舍

應和

家南廬湖上

錢塘楓葉下客思日紛紛湖海依舟楫交游廣見聞夢還先  
雁到秋亦向人分惆悵西湖水冰壺獨照君

海塘卒二首

海塘卒島鹵不可田一丁領官糧全家遇豐年虛名上軍帖  
百可以當千營中鼓角聲和平蹴踘呼盧外人羨揚鞭不敢  
走官塘恐被海風吹馬面

海塘卒運石纍纍朝至夕朝崩一丈夕築一尺玉環嵯峨海  
門開闢天地異視寒心爲鐵吁嗟齷齪民老爲營中役田荒

米貴作雇夫妻孥飢寒上商舶

鬱輪袍

主家絲竹競敖嘈上客當筵一曲高  
凝碧池頭聽絃管新聲可似鬱輪袍

豹隱山房寄友人

禪房花氣深三面抱平林野水新添竹  
秋雲欲上琴樓陰開晚霽樵響引歸禽  
之子不相見推窗望遠岑

題後村集

范陸還應步後塵拾遺天寶一吟身  
孤忠那用論名位自把劉蕡列十臣

無題七首

家住橫塘道姓羅犀梳長自掠雲縞問他燕子簾開未怕得  
楊花雨較多錦瑟年華愁落寞綠珠心事欲如何酒闌別有  
匆匆意故作含羞不肯歌

寂寂重樓自怯登肩因低語幾回憑劇憐嬌暈非關酒欲與  
溫存不奈燈響屢廊邊秋瑟瑟曲屏風外月層層曉來似爲  
春寒重侍女頻催起未曾

髻子新簪抹麗牌金鈴花底吠人來扇因撲蝶秋猶弄簾爲  
熏香午未開低拂曉雲迴畫檻亂吹紅雨點蒼苔東風比與  
誰肥瘦昨夜庭前有落梅

煙斷金猊上玉鉤綠窗人靜叫鞦韆扶來卯醉酥慵後瘦盡  
丁香料峭秋花落黃昏猶靨面日高深院未梳頭最憐嬌婢

如芳草慣引閒愁上小樓

手搓梅子擲嬌鶯調戲堦除太愁生隱語偏教多叵測泥人  
半是不分明慣聽燕婢傳閒事怕被鸚哥喚小名繡罷無聊  
消永晝刺桐陰裏響棋枰

紅橋初上月三分惜別匆忙酒半醺那自有心負小玉可堪  
無路問朝雲夕陽夢裏梅花額秋草闌邊蛺蝶裙薄倖江南  
爭唱徧只應愁煞杜司勛

淒涼院宇已全非燕麥叢生鴨腳肥未寄尙留封後信重來  
猶著別時衣寒蛩錦砌吟朝露蛛網閒門鎖夕暉賸有海棠  
纖手植年年花發待君歸

擬平蕘歌四首

莽莽千山木箐寒連營占得拂廬安崑崙六月消春雪併入  
河流飲馬乾

衛霍連鑣振旅還花門務面覲龍顏不勞壯士長纓繫

天子寬恩詔入關

朔方虎將氣桓桓埽盡欃槍始北轅馬上回看知漢大嶰巖  
月窟向中原

北斗高懸虎旅屯天門詆蕩耀勾陳相公自解戎衣入馬後  
降羌盡部民

與吳榕園借琴

明月正照江之潯澗泉活活鳴空林目送飛鴻落葉下停觴  
忽憶風中琴榕園先生雅好古熏以龍涎襲以組成連海上

刺船迴散髮解簪一再鼓渺予不辨牛鳴益大言炎炎啜越  
俎樂宣人情所難言有聲無辭吾獨取強以文字律絲肉如  
施桎梏揮斤斧白華華黍意亦然本不曾亡何待補巫峽雲  
生湘水秋蕭蕭修竹呼斑鳩鮫人擊楫龍女舞丹崖翠壁迴  
中流蒹葭蒼蒼白露下楚妃欲出蒼梧愁美人遠貽囊中絃  
託修鱗兮慰予憂夜來操縵花開處銀淚斜侵天欲曙琴理  
自在響寂外靜極而動時一遇吹簫擊筑往日豪箏笛紛紛  
何足語停揮忽見落月橫一鶴一僧江上去

落葉二首

曉來谿雨響山鳥鳴幽壑平林不見人蕭蕭隕寒鐸停午日  
悄悄向晚雲漠漠疎籬一茅舍板橋兩芒屨飄零雖暫時秋

風豈可託故枝苟不移安問榮與落

楓林託喬基烟巒隱木杪涼飈一掃蕩羣山忽如曉幽幽曲  
澗邊樵斧響未了夕陽上前谿孤雲帶歸鳥感茲零落意未  
免傷懷抱因思深院中梧桐葉如埽從來遲暮悲美人知獨  
早

古意三首

樓外梧桐樹時時就月看送君一葉下應念故枝寒  
打槩橫塘外相逢一笑春露濃行太早愁煞采蓮人  
少婦挈銀瓶高梧露井陰君如輶轡索深淺在儂心

山居二首

兩板衡茅獨樹支春陰苔徑裊游絲嬾澆花候鳩呼雨乍把



杯時客乞詩閉戶鑪鑪幽夢愜開園蔬笋小童知閒來亦憶  
江南事自畫烏絲寫柳枝

茶經藥譜注蟲魚車馬何人過徹廬釀酒尙餘新乞米典衣  
且償舊賒書衰親扶杖看花晚小妹挑燈問字初更愛前谿  
春水漲隔隣添住白頭漁

古詩五首

黃河之水盡作杯中酒壯士方肯老山阿讀書不得致卿相  
虎頭食肉操天戈泥塗螻蛄屈那論命駛驪咫尺王良過爲君  
長歌行路難白日雷霆劒篋翻

上堂辭親去堂上淚如雨蹙驢壘塊不肯前道傍絕倒瞿塘  
賈朝入萬山中風吹亂石如飛弩暮宿野人家紙窗暗射金

蠶蠶思親不能置白雲望鄉土牧童歸來語阿母三日抵羊  
跽飲乳

樓前梧桐樹正及秋風時游子下樓去梧葉上樓飛佳人弄  
瑤瑟字字寫相思相思不可見遠寄篋中絲明月蕭瑟入羅  
帷牀頭絡緯鳴聲悲挑燈看絲心自知亂絲不治君不歸

南方有一客自言生長黃金臺長楊射獵逐鷲獸三箭三殪  
聲如雷漁陽豪俠盡祇揖歛若赤電崑崙迴一朝流徙來三  
吳監中牧馬作官奴腰纏鵝鵝鬚不得吳趨那識青珊瑚君  
不見江南執袴美少年日日驅車向幽燕

男兒不出門詎有婦女衝風塵身行萬里須及早乾坤瀕洞  
雙車輪幽并健兒笑齷齪餓填溝壑猶冠巾鑿隲留辜趨關

陝長纓倏忽渡河汾不然閉目自成梁父歌  
鷖中椰子金叵羅雕屏匝匝朱顏酡及時行樂奈爾何吁嗟乎今日不飲明日無決烈尙愁多蹉跎

簞谷詩鈔卷二

海昌查揆梅史著

送馮補亭

念祖

天開碣石中原小  
河壓青齊太岳低  
萬里縱橫長劒在  
一生名字布衣齊  
三千客自憑君掃  
百二關須待我題  
莫問故鄉舊豪俠  
要離塚畔草萋萋

曉雨偕南廬登妙果山遲陸少白

素生

不至

天明著屐去不暇  
更櫛髮扣門過北鄰  
云已往采蕨登頓廻  
幽徑宿霧冒林樾  
牆陰卽字花衣袂香  
可掇琅玕滴清露  
聲欻動棲鶻人行縹  
碧中澹若沙上月  
林外一聲鳥曉烟  
忽已歇

日高僧猶眠松風吹之起茶絲颺輕藹一裊疎簾裏煙空樹影合寒綠靜於水神依不在境卽事聊爾爾陶公無絃琴妙會亦如此美人期不來蒹葭滿中沚

春闈怨

夢罷漁陽蠟燭紅早梅落盡桂堂東江南春雪寒於水未必南來有塞鴻

午日大雨同南廬作

江鄉五月梅雨淹檐牙不斷珍珠簾搖艇入戶谿入屋鼃妾惆悵突不黔隔谿小院頗倜儻扣門一笑青矚矚平生豪氣除不得有如斷水抽刀鎌又如水銀潑地走一瀉不復留微纖袖中懷刺真小兒漫滅空爲公卿嫌婆娑起作鵲鴒舞稜

稜瘦骨雙嶄岩薜花繞壁蝸牛鬪神塗鬱壘顏如黧老屋簷  
蕩雨不止舶遑風裏波濤添天公縱爾殺風景平原十日意  
氣炎樽桑明日看晴旭載酒湖船已挂帆

湖樓

衣袂沾空碧門依竹石開比鄰多酒戶隔岸望琴臺月白湖  
先曉山寒雨欲來水禽如落葉薄暝下蒼苔

掉舟自六一泉至錢塘門遇雨

松風急響如調笙濛濛林表飛鳬卿庵東炎曦掩西雨中間  
一塔分陰晴雨隨雲勢四角轉如蟻旋磨珠翻檠須臾湖面  
雲亂捲斜飛一線圍江城南屏老僧催客散漫課梵筵鐘早  
鳴孤篷繫向斜陽岸船尾猶聞滴瀝聲

紫雲洞

棲霞背明湖紫雲闕幽邃觸熱尋梵音憑軒飫清吹山勢如  
飛湍簷頭森焉墜積鐵不可拔盤空插靈巖陡壁截鋒鏑虛  
堂敞深邃橫跨老龍脊倒挂飛鳥背峯形併下懸石根森上  
刺百怪破扉入陰雷爭門出縈紆螺殼中鍾乳觸額碎藤梢  
墮白蝠岩隙棲蟬蛻涼生沁肌骨綃衣染寒翠悠悠出塵想  
從茲勞夢寐

由白沙泉至金鼓洞

輕寒樹杪來泉聲人不覺蕭然微雨至池上下寒鵲冰雹走  
炎天江河歸一握黃冠頗習靜見客頻引卻我非褊褊人自  
愛溽暑鑠

石屋洞

山中秋未至木葉已蕭瑟踰嶺踏鰲背盤空入蛟室連峰隱  
石林竹樹梢蒙密亭午雜明晦寒光炯流溢雲日交參錯陰  
雷從中出昨者紫雲洞目眩故無匹豈知叢莽間結構更酋  
峩散髮飲乳泉茸茸紫苔茁吾廬龍山上幽邃頗可述平生  
米老顛杖策不暇櫛深慙古苾芻鐘魚此抱膝

九谿十八澗

連山圍如鐵甕口快意一瀉蛟龍走奔流怒與垠塉爭以水  
還山山不受山人錯疑巨靈擘誤倒牀頭軟脚酒接羅倒著  
膏騰行草花亂插帽簷後水聲引入幽谷裏石龕坐聽蒲牢  
吼洪濤風起潛蛟躍雪練橫空不可搏人言九谿十八澗來



往似轉轆轤索乍從脚底穿林去旋向額邊迸石落日眩前  
頭碎礫飛步廻著背驚雷作一澗中分南北流干渦忽合東  
西壑暫停崖口又橫行倒走峰尖復引卻廬山瀑布古所誇  
玉龍跳出翻日車又聞趵突三起伏亂飛凍雪灑冰花二者  
夜嘗夢見之今來此地如乘查明年買屋山中去竹閣曉聽  
飛雨注君看逝者如斯夫山住何曾水亦住

蘇詩人言山住水亦住

### 水樂洞

亂山合沓爭高壁巨靈擘破老蛟宅連峰浩浩波濤白崩崖  
一尺雪千尺摩崖大書水樂洞走沫濺珠如裂帛雷車隱隱  
日午鳴東溟跋浪翻長鯨羽衣仙人下張樂魚龍出戲空中  
行吾來湖上聽靡靡直厭淫聲入骨髓能移人情卽真樂成

連一語得其理海水汨沒羣鳥號鐵板銅琶徒聒耳淵明無絃猶多事併琴不設真妙旨持此問水水不知濯髮滄江從此始

### 理安寺

平生習僻徑來憇古蘭若孤磬細泉流殘雪松花灑空青落煙蘿結構取幽雅陂陀入深谷列嶂敞眞廈壞雲脫欲崩虹霓束其下元氣至此住風濤不敢瀉欲乞東坡衲結夏此僧社遠公不可見吾語亦聊且

### 由理安至江干行亂山中

四面走灘聲身如一葉輕虎參僧入定雷挾石空行薯蕷干林暝牛羊半塢晴秋江行漸近長劒忽縱橫

徐村

涼影絲絲裊豆棚酒旗輕颺雨初晴白雲遮斷江邊路惟見  
孤帆樹杪行

五雲山

一峰白雲下一峰白雲上不知修簷路但隨白雲迂白雲忽  
不見江流挂青嶂一峰更窮劣勢與天門抗其餘盡雄駿屹  
立森排仗帆影過崖側藤根落秋漲盤陞百丈石倒作狂瀾  
障或言羅刹磯於此蹴駭浪何當摘鐘乳攜歸作春釀

雲棲

密林含幽光微徑岩壑露藤陰人跡絕空翠落如注行吟摘  
蒼耳曉露溼芒屨修篁翳石壁幽禽啼不住松風吹白雲流

出礪泉去蒼煙迷馴鹿暝色下振鷺尋僧入山寺煮薺談禪  
悟

夜宿雲棲山房同張笠溪明經畢曾家南廬

天公留作山中客飛雨簷頭瀑千尺郎當入寺帽檐斜乞火  
僧廚烘木屐平頭奴子雙脚皺暗笑猖狂鵲眼白齋堂頃刻  
吼蒲牢佛粥油油似流液珍禽下翔啄五粒一片斜陽照高  
崖磬聲徐出松檜間苔徑獨立孤鶴瘠人聞日車如投梭頭  
顱如許歲月迫何不薙髮向古德又恐哦詩師所斥今宵明  
月向人圓已是今宵非曠昔若再不飲新薺碧如此溪山真  
可惜

雲棲曉起

鳥雀猶未起山僧催曉餐泉聲銷酒力雨色釀秋寒乞火來  
茶戶行吟近藥欄朝陽上驢背清夢不曾闌

郎當嶺

遙指峰尖雲起處一線天門裊飛絮行人迤邐入雲中雲往  
前峰高處去遙指雲中山盡頭行人到此飛鳥愁羊腸又上  
青天去雲氣空濛足下流是時雨過初陽耀泥滑難教乘竹  
轎蹢躅作勢類螭蜺繭足荒山猶絕叫路迴如髮身千鈞屢  
欲回頭不敢掉百年一蹶那可料失勢一落山鬼笑

風篁嶺

扶病尋山觸熱吟坐來林石小披襟松間雲影頻遮路分得  
天公半日陰

卽事

有限狐邊腋無聊爨下薪  
應迷日五色還悞虎三人  
袖底羞懷刺車前尙紅茵  
不曾送窮鬼未敢論錢神

山行口號二首

因摩古碣苔沾袖爲聽清泉雨  
溼衣選石慣當幽處坐松花  
滿地白雲飛

病顏如許狂難減酒債雖多醉不妨  
日日湖頭歸路緩不逢  
細雨卽斜陽

懷馮補亭高唐

看取牀前明月光應思堂上髻添霜  
只愁岱頂蒼雲起高處  
無由見故鄉

小飲壑園作

花時那用錦纏頭三百青銅一敝裘  
戒飲尙餘中酒病倦游  
猶上看山樓岩前石筍參差起樹杪  
湖雲委婉流欲訪太初  
居士宅短衣落日看吳鉤

飛來峯

靈鷲一峯夜飛去雷雨追之不可及  
梵僧魚貝響清晝玲瓏  
忽向檐前立恍如張顛醉作書鬚髮  
淋漓濡墨汁猙獰羅列  
饕餮狀輪囷下見鴈鼻蟄巖扉洞戶  
砢然開髣髴如見鬼神  
揖金支翠蕤恹恹間日月逡巡不敢  
入青林岩上暮猿啼有  
客頻來荷簪笠何當十幅展素纈收  
拾烟霞入瓊笈欲呼王  
孫談禪悅連棧參差不可級白雲滿  
谷樵徑斷橡栗纍纍無

人拾詩成醉卧絕壁底秋雨忽來山鬼泣

湖上二首

嬉春時節水仙祠尙記清狂折柳枝春水綠波愁嫋嫋畫簾  
微雨夢遲遲添來半臂寒初褪勸到雙鬟酒不辭舊恨分明  
銷未得麴塵吹上海棠絲

紅闌擲笛髮垂髻鬢幘東風二月交鶯嬾只愁黏凍雨花疎  
無奈抱寒蛸張家樂府鞦韆影杜牧風情豆蔻梢多恐春愁  
容易惹斷腸何處覓鸞膠

竹素園納涼

十笏蕭閒地蘅蘭被滿庭石花牆染黛秋雨水生螢散髮稻  
康鍛高吟柳惲汀好攜長鏡去籬畔課蛙丁



湖上

相逢一笑白鷗汀  
巾子峰前倚櫂停  
郎似浮萍儂似水  
有湖水處有浮萍

報恩寺

明季失控馭魁柄  
授凶穢神宗計儲國  
左右逞鼠輩礦稅使  
四出流毒徧闔閭  
傳驛貢茶鹽航海進  
珎瑄陳增與魯保驛  
騷理不貸孫隆到江  
南激變起鋤耒葛成  
真義士墓合五人配  
是時吳越民枯魚等  
一概胡然放生池殘  
碑誌遺愛吾聞宋熙  
寧坡翁此州倅孤山  
報恩院茗話琴聰對  
此亦襲其名取義竟  
安在施金募給孤未  
許參無礙脂膏黔首  
窮金碧祇園續然能  
事放生差異列鼎聽  
講堂魚唄清花雨歛  
巖黛後

來普德祠祝釐媚大憝施張記與書千載羞置喙城狐旣授  
首壯麗歸荒蕨何如廬舍菴香火未有艾世宗禁內臣寶錄  
有祖誨奈何狎儉邪累世不知悔誰與獻彰義令人發深慨

### 游仙四首

游戲人間未擬歸上清淪謫記依稀金莖不解相如渴朱鳥  
猶憐曼倩飢鵲扇曾揮陪燕席龍梭賸賦侍書衣會當乞得  
壺公杖便控蒼虬霹靂飛

璇扉榆葉覆陽烏私折筵尊召楚巫已分投壺憑玉女何曾  
搔背倩麻姑泛來槎客銀河淺賸去魚兒碧海枯身似珠塵  
飄未定越人無計網珊瑚

蔣侯三妹正華年居處清谿孰辨妍祇隔層城三里霧悔無

營室五銖錢風姨慣逐萍花起月姊私將桂葉憐碧藕雙頭  
新種得嬾尋瑤草大羅天

玉書何日署吟曹丹陛詩成賜絳袍縮地自知瑤島近馭風  
終覺碧城高辟邪鼎炷蒼龍腦駐景樂添白鳳膏卻與洪厓  
爲醉伴酒船隨處擁雙螯

歸鴻怨

美人睡起簾鉤捲畫眉飛來啄蒼蘚征夫萬里遙愁腸鹿盧  
轉妾夢願逐春風行吹君衣上霜雪輕霜雪天山大思鄉巨  
長夜誰穿忘歸矢卻射羽書下寄語盧龍左莫舉平安火平  
安火散圍中寒穩住飛鴻不向南

慨予四首

慨予家中落蓬蒿三徑生愁多銷意氣貧亦損才名賦罷病  
梨樹餐餘秋菊英窮年寥落感不獨爲商聲

垂老尙依人分憂愧此身書來雖善飯客裏總勞薪夜雨青  
氈冷秋霜白髮新歸來看繞膝問事挽鬢頻

封鮓知何日棲遲尙掩扉曾無一日養已覺昔顏非寒夜猶  
勤織豐年尙苦饑兒心如寸草何忍見斜暉

底事高堂月偏來照髻絲憐兒猶少日娛老竟何時截髮教  
留客牽衣笑詠詩飛騰看五十春酒獻金卮

烈女行

有序

爲曹氏作也女許字族姪

世裘

幼爲翁姑所撫未婚

裘

卒女

義不改適服溲死癸丑九月初五日也年二十有五予仿古

樂府志其事以俟采風者

風吹梧桐樹烏啼滿前村落葉離故枝猶然依其根皎皎名  
家姝弱齡嫺禮儀鞠養於姑嫜殷勤代晨炊百年奉高堂矢  
願永無違一旦遭飄零庭蘭忽焉摧縑素爲元黃其色不可  
渝妾身許君子其名不可虛歛容拜姑嫜以門自踟躕可憐  
未成婚遣歸當何如妾如輶轡索君似方中水輶轡未轉井  
水枯抽刀斷索無汲理計決無所哀遠巡復出戶晶晶釜中  
鹽今日得死所食鹽愛鹽潔鹽多不知苦妾死爐中灰妾生  
襟上塵塵生衣不潔灰死香自存凜凜古節烈聞者爲哽咽  
吁嗟烈女可再生釜中鹽水不復清

秋夜寄鍾箬溪二首

好月當頭便解襟  
巡簷疥壁費沉吟  
團團燈綴銀蟲小  
蓓蕾花銜玉蝶深  
茶鼎生風降睡力  
酒槽如雨殺秋心  
寒蛩撩破藤牀夢  
桐屋蕭騷接葉陰

屏當芸編歎索居  
彥威豪氣近何如  
停雲屢咏聯吟什  
夜雨頻翻舊寄書  
秋色苔絲寒峭峭  
露光蘭葉影疎疎  
定知擊鉢狂奴態  
時有浮瓢到敝廬

夜坐口占

撲簌蕉團漸有聲  
欹斜席帽八叉行  
濕螢飛几攤殘帙  
敗葉空廊掩短檠  
書藁乍成朋入夢  
酒缸初揭客班荆  
裝綿甲夜涼猶嫩  
梧井陰濃絡緯鳴

送南廬之江南四首

墜葉作離聲。猶然戀故林。鴈還隨越客。琴已變吳音。夜爲窮  
愁永。秋偕酒味深。河梁一揮手。何日重題襟。

相送無他語。沙頭殘月生。驚心千里別。努力少年行。愛酒終  
嫌僻。論交莫近名。明朝聽谿水。猶似挂帆聲。

露白吳王苑。楓青少伯祠。片颿漁共遠。幽處鷺先知。花窖春  
衫穩。燈船豔曲遲。風流語柳七。好爲寫烏絲。

肯爲邠公絹。遂忘齊掾尊。作碑終戒諂。彈鋏不辭貧。嬉笑憐  
通子。艱難愧老親。征衣莫輕澣。上有故鄉塵。

### 示兩弟二首

俯仰乾坤愧此身。茹荼集蓼祇長嚔。不才自合安窮薄。垂老  
何由尙苦辛。割粥斷齏成故事。烹雞負米有前塵。他年慎莫

狂兄似歎段還家卽善人

結用宋人語

蕭瑟田園海市邊團圞兄弟話樽前菊殘寒雨秋燈夜鴈怯西風落葉天待爾成人知幾日看親老病已多年昨宵慈母裝綿語鄰有孤兒帶露眠

與少白游東南諸山寄鍾大

拄頰看山參差間柴門烏雀時往還隔溪竹樹曉慧宅提雙不借叩其櫺東南螺黛招客去棕鞋桐帽髮脚頑隨白鵬往漸迤邐遠村十里烏柏丹病葉落盡山骨瘦如見故人愁中顏是時谿上新雨過石林霞氣魚尾殷平坡晃朗抱墟落白雲來去修篁間細踏樵徑墜籜響藤梢橘刺相勾攔鳬卿成羣蘋蓼渚雅舅千點蒹葭灣風吹酒香聞壓榨茅檐秋色紅



斑斑下若醅。沁肌骨髓引滿胸。次芟荆管眼中好景合畫得  
雲藍百幅才。豈慳簪谿於今好作手橫谿而後抗者艱文章  
得山水助史遷善游夫豈漫柰何坐困戀牀第陶公脚疾  
徒蹢躅或謂山靈忌發洩懼五丁力通百蠻躡踞山鬼謀聚  
族擲掄不使窮躋攀是語或然吾未信何子健走文不爛梁  
肅重脰雄饕吃等身著作盛贊歎憐才造物有深意坎壈乃  
俾名嶺岼偏提更酌頽然醉吟聲遶屋波潺湲漁人遠浦唱  
歌返微黃新月弦初彎卻從歸路崎嶇後展卷長哦行路難

卽興簡家南廬六首

彈鋏歸來嬾乞憐。寂寥吟榭儘高眠。摯虞洛下清貧日羅隱  
江東落魄年。調水符將僮約代。作碑錢爲鶴糧捐。比來秋雨

寒窗夢長在青鞋布襪邊

蕭棲過我少高軒枯苑寧須作意喧不見侏儒憂飽死漫勞  
饔吃著方言答將賓戲詼諧甚續得離騷感慨存且與敝廬  
勤點檢魚租鴈稅水邊村

鍛羽翻教笑冥鴻遽然深省聽晨鍾才人畢竟歸廝養名士  
從來雜保傭修竹彈應空慨慷芳蘭鋤不少從容手談聊欲  
消岑寂急劫無端局上逢

江左風騷爾太癡杏花春雨袂游遲金釵泥換元稹酒團扇  
爭裁柳惲詩廿四闌干憐綺歲十三豆蔻惜芳時美人香草  
無聊語不分人稱杜牧之

水仙祠外醉羅裙記共湖頭角酒軍謾語小兒楊德祖清談

上客沈休文釵鈿勝事傳來豔花鳥新銜署後芬自是少年  
應作達嬉春歸去每斜曛

唾壺敲缺浩歌頻兩版衡茅七尺身乞巧文知長自誤辨顛  
帖欲向誰陳滑稽翫世東方朔浩蕩游仙郭景純持贈莫將  
腰下劔燕臺年少已無人

### 食山芋偶成

鳥啄柴門雪壓竹幽窗睡起肌生粟爨下薪憐中郎桐釜中  
炊欠元方粥東坡先生玉糝羹齒頰歷歷清且馥疑是輪囷  
采藥嘗依然饜飫蒸梨熟盤盂新分雕胡香肌膚紅潤荔支  
肉差異名士畫餅充物雖至賤飽亦足杜陵橡栗緣饑驅伏  
波薏苡消炎毒輒軻庸玉汝於成飲食亦令澹所欲飽啖慎

勿致厭棄鹽鼓終笑羊酪俗高歌不種南山豆把盃已落東  
籬菊

畫馬

馬無伯樂空自憐何況圖畫泥塗跼雲霧畫冥飛鳥落龍文  
歎忽窮騰騫聳立森如山嶽時疾走瞥爭雷電先墨光凌亂  
去無影逡巡卻笑羲和鞭以身作馬通馬性波濤蹴踏相廻  
旋毫尖揮斥于驂馭始得昂藏神理全狂氣已無紙尺幅顧  
盼萬里幽薊燕是時關塞紛落木杈枒枯樹烏剝啄牽來七  
尺好頭赤氊褐蠻奴催放牧展圖借問作者誰歛識鈴印不  
可讀權奇侔儻已千載姓氏何必留塵俗吾觀此馬真天駟  
不逢支遁空躑躅蒲梢齧膝種類高瞻控縱送勞播撲蒼蒼

迥立青瞳凝八駿當年亦凡畜畫手已無韓幹名後人肯以  
千金鬻成敗論人馬亦爾掉頭且飲新醅熟夜來風雨浩呼  
洶似聞驕驕歎局促

雨夜寄吳上舍

應和

懷人如落葉祇向雨中深孤枕新秋病疎燈獨夜心詩憑寒  
雁寄夢向白鷗尋溪漲柴門外蒹葭爲爾吟

岳武穆王金聲歌

紹興南渡社稷臣武昌咸平功尤超背嵬八百撼不得太行  
兩河皆人豪鄆城朱仙大獻捷鐵浮圖軍紛潛逃獄成三字  
莫須有廟堂燭惑狐鳴嗥見機始歎斬王高醉眠驢背攜杯  
瓢此時繆醜方烜赫三世纍纍銀綬條填堪連鑣皆上第冰

山詎料朝陽銷王之文孫忠孝後程史筆挾風霜驕能讀父  
書峻風骨下視嘉國猶弁髦金爵隆興珂所作紀乃祖烈鄂  
與褒藏之家廟謹什襲春秋獻享行清醪河南陵寢秋蕭騷  
不聞一爵奠丹椒何年淪落雜瓦礫會稽山下虹霓交石鼓  
作曰神物怒野人不識沙中淘客來徵詩誇至寶蚺螭鬱律  
蛟龍韜下卣中壘失規橈夏璣殷罍侵萊蒿廻黃轉綠古色  
澤赤城霞起朝建標史籀斯篆苔暈蝕背又四字勞鐫雕神  
氣肅穆稜角厲令我懷古心鬱陶王昔精忠志恢復義旗疾  
捲風驅濤黃龍痛飲須臾頃月支之頭盛醑糟鈞天夜奏醉  
不醒交訂倏忽廻韃囊金甌已作偏安計酒器頻隨歲幣勞  
子卯不樂知螢死杜蕢揚觶誰其曹檜也翻得賜酒器敢與

鐘鏞爭嘩呶孝宗積弱勢不振諸將無復建旌旄允文六事  
不見省同甫五論徒取嘲長城萬里汝自壞此爵於王如秋  
毫至今留遺等枯椿桓彝節空喧壽陵谷變遷已千載沙  
蟲猿鶴魂難招諸陵玉盃竊發盡維王之爵愈光昭作歌記  
事好藏弄宣和秘翫笑繫匏

曉寒微雪客來叩門偕至妙果山幽壑寵窈寒林峭蒨  
朝陽旣升不復見雪而竹影松聲皆雪意也循山麓行  
數百步有村酒店臨水啟小閣楊柳數株鳬鴨往來其  
下谿風泠然可以醒酒泥飲久之率成四韻

客鑰柴扉去僧開竹徑看澗枝乾雀凍溪路早梅寒側帽凭  
松檻橫琴坐石欄行吟幽興愜買醉夕陽殘